

Scutinar dil vargau

Rico Tambornino ha dau nova veta ad in act criminal curdaus en emblidanza

■ (anr/ac) Igl autur Rico Tambornino ha prelegiu la gievgia vargada ella sala da cultura a Trun da sia novissima ovra «Il scutinem dallas olmas». Ella cuntegn, a prau cun diversas reminiscenzas digl autur ord il temps da sia giuventetgna, il raquent criminal «Il zuppau dalla riva». In raquent che camina sin fastitgs historics. «Ils 2 da fenadur digl onn 1847 entuorn las duas il suentermiezgi ha Georg Anton Tomaschett, in vischin da Trun ch'era sin via da Zignau encunter vitg, fatg sut Darvela ina scuvretga horribla.» Cun quella construcziun ha igl autur Rico Tambornino entschiet la gievgia vargada ella sala da cultura a Trun sia prelecziun. Ina prelecziun instradada dalla biblioteca da Trun e dalla Chasa Editura Rumantscha per render attent alla nova ovra digl autur oriunds da Trun: «Il scutinem dallas olmas». Ella emprema part da quei cudisch suonda igl autur cun siu raquent criminal «Il zuppau dalla riva» ils beindocumentai fastitgs dil mazzament dalla vieua Maria Catrina Derungs. Il Georg Anton Tomaschett catta la bara dalla dunna: «Secund ils meis dils doctores sil plaz, pressapauc el quart, sche buc el tschunavel meins da gravidanza. In cass horribel, in cass criminal, sco gia detg, probabla in assassinat dubel.» In assassinat che para d'haver fatschentau fermamein l'inquisiziun sco la publicitad sur silvana e grischuna dil 19avel tschentaner. Bein ha Tambornino dau plaz a sia creativitat e libertad sco autur da recapitulat ils fatgs succedi avon 170 onns. Tutina ei igl autur suandaus ils fastitgs historics nudai en buca meins che 400 documents. L'inquisiziun instradada dils officials dil cumin dalla Cadi ha spert definiu il culpont e menau all'arrestaziun da Giachen Condrau Spescha, in am giuven da Trun. Ils 30 d'october dil medem onn ha quei Giachen Condrau Spescha terminau sia veta sil Kalkofen ella vischinonza dil Welschdörfli a Cuera sut la spada dil carnifex. Dus dis avon ha il cussegl



Rico Tambornino ha, suenter ina pli lunga assenza sco autur, presentau a Trun sia novissima ovra: «Il scutinem dallas olmas» che lai repassar regurdanzas e fatgs historics.

FOTO A.CADONAU

grond renvieu sia damonda da grazia cun 31 cunter 26 vuschs.

Spescha e la peina da mort el cantun Grischun

Il mazzament da Trun ha natiralmeins fatschentau ils historichers, essend che Giachen Condrau Spescha ei staus il davos delinquent grischun sancziunau dad ina dertgira grischuna cun la peina da mort. Curiosamein eis el curdaus enzacu ord las annalas dalla historia grischuna ed ha surschau la honur dubiteivla dad esser staus il davos suttamesse al trauement mortal ad in auter delinquent. Las circumstanziis ed igl ambient historic dil trauement dil delinquent ha il historicher Martin Camenisch explicau la gievgia vargada a Trun sco en ina contribuziun enteifer l'ovra da Tambornino. Came-

nisch ha tschintschau dad in dossier particular dil cass Spescha egl Archiv statal dil cantun Grischun. El ha menziunau la debatta ellas gasettas grischunas da quei temps davart la peina da mort. La stretga decisiun el cussegl grond viers la damonda da grazia da Spescha documentescha la dispoteivladad dalla peina da mort el Grischun. Plinavon demuossa il fatg che la dertgira criminala da Cuera ha tractau e sancziunau e che l'execuziun ei succedida a Cuera las stentas dil niev ambient statal da lezs temps dad unificar e centralisar la giurisprudenza el cantun Grischun. Malgrad l'indipendenza giudiziala dils singuls cumins. Per regla, aschia Camenisch, hagian ils cumins delegau ils cass pli e pli stedi a Cuera. Era per spargnar daners da dertgira ed en munconza dad in arrest.

Ils Talianers vegnan

En ina ulteriura part da sia novissima ovra meina Tambornino ses lecturs el temps da sia affonza exactamein ella casa da siu tat. A Trun ha igl autur delectau il publicum cun sias reminiscenzas davart l'arrivada dils luvvers jasters a Trun. «Ils Talianers vegnan» dat a moda divertenta investa els onns 50 dil tschentaner passau cu il resvegl economic ha menau numerus luvvers digl exterior en Surselva e per da dretg a Trun. E quella vischianza ha rendiu honur agl autur indigen cun ina numerusa preschientscha a caschun dalla preleziun da Tambornino la gievgia vargada ella sala da cultura. In fatg ch'ha intimau la menadra dalla Chasa Editura Rumantscha, Anita Capaul, alla constataziun che Trun possedi in ferm sensori per la cultura ed el cass Spescha pli probabel era per la historia.

■ BALLAPEI

Tiarza victoria el tierz giug per Schluein Glion

DA BEAT DERMONT

La partenza el campinadi 2018/19 ei definitivamein reussida all'equipa da Schluein Glion. El tierz giug ha ei dau sonda vargada encunter Eschen/Mauren 2 la tiarza victoria e quella gada schizun senza survegnir in gol. Exact ina minuta e sedisch secundas ha Schluein Glion duvrau per sittar igl εμπrem gol encunter l'equipa dil Principadi dil Liechtenstein. Marino Cavegn ei vegnius lantschau en l'ala dretga e sia flanca ei setschentada per sorpresa dil goli dils hosps – ch'era postaus empau memia anavon – bi el cantun ault liung. Suentter quella partenza optimala ha l'equipa indigena dominau il giug senza difficultads ni schar schanzas als hosps ed alzau il resultat entochen pausa sin 3:0. Il 2:0 ha il defensur Stephan Berni sittau, el ha menau suenter 27 minutas in culp liber da Luca Vinzens cul tgau en la reit. Quei cuort suenter che Tiziano Vinzens haveva tuccau cun in siet da distanza mo la petga. Il medem giugadur ha diesch minutas avon pausa mussau in solo sur la vart seniastra e surviu la balla a Serafin Bundi ch'ha cun grond engaschi stuschau la balla ord cuorta distanza sur lingia en al 3:0.

Suentter pausa ha l'equipa indigena priu il giug empau pli pacific. Ella ha controllau la balla ed igl adversari e ha buc encuretgn cun tutta vehemenza d'alzar il resultat. L'equipa d'Eschen/Mauren ha buca saviu nezegiar quei ed ei era en la secunda mesadad strusch vegnida malsegira avon il gol da David Hornacek. Sulttamein ina gada ha lez astgau mussar sia classa cun frenar in siet ord cuorta distanza cun ina reacziun sperta. Empau colur al giug ha persuentter igl arbiter dau en la secunda mesadad. Naven dalla 58avla entochen la 95avla minuta ha el numnadamein mussau buca meins che nov cartas melnas en in giug plascheivel cun strusch in soli foul grop ni aggressiv.

3. ligia
Schluein Glion – Eschen/Mauren 3:0 (3:0)

Crap Gries. – 222 aspectaturs. – Arbitrer: Ajidini

Gols: 1. Marino Cavegn 1:0, 27. Berni 2:0, 35. Bundi 3:0.

Schluein Glion: Hornacek; Dermont, Berni (84. Matthias Derungs), Livio Derungs, Silvan Welter; Bundi, Luca Vinzens, Marino Cavegn, Tiziano Vinzens (77. Sergio Welter); Caldeira (63. Tschalèr), Caduff (73. Fabrizio Cavegn).

Eschen/Mauren: Majer; Ubavic, Odobasic, Severin Weibel, Nipp (64. Frederik Weibel); Dennis Demirci (73. Ok), Bleisch (86. Ugrica), Eris (46. Dincer), Sangrigoli (82. Andre Demirci); Kardesoglu, Pattocchio (59. Bolat).

Remarcas: Schluein Glion senza Andreoli (blesaus). – Cartas melnas: 58. Caldeira (nunsportivdad), 62. Berni (foul), 69. Dennis Demirci (reclamar), 78. Sangrigoli (foul), 81. Bundi (foul), 87. Fabrizio Cavegn (foul), 90. Luca Vinzens (foul), 90. Bolat (nunsportivdad). – 26. siet en la petga da Tiziano Vinzens. – Corners: 3:3.

■ SVIZRA

Violenza cunter dunnas giuvnas crescha

(rtr) La violenza encunter dunnas giuvnas crescha – surtut sch'ellas sa chattan en il spazi public. Quai rapporta la «SonntagsZeitung» sa referind sin las cifras da statistica d'accidents. Il 1995 ha i tenor la statistica dà 200 cas da violenza cun blessuras tar dunnas giuvnas tranter 15 e 24 onns. Il 2016 eran quai gia 640, pia trais giadas uschè blers. Ils cas laschian er supponer che la violenza daventia adina pli brutala. Uschia èn er ils custs da guariziun per cas praticamein sa dublegiads aifer ils ultims onns. En la statistica èn registrads tut quels che vivan en Svizra e ch'èn assicurads tenor la lescha d'assicuranza d'accidents. Il dumber da las dunnas giuvnas assicuradas è praticamein stà tuttina sur quests onns.

Café Zeitlos arva sias portas en Puntreis Center da sanadad a Mustér

■ (cp) Alzheimer Grischun arva gia il quart Café Zeitlos el cantun. Naven dil settember arva il Café Zeitlos inagada al meins sias portas a Mustér en Puntreis Center da sanadad. Mintgamai il venderdis suentermiezdi porchia il Café Zeitlos a persunas cun demenza, tierparents ed interessai ina pusseivladad da s'entupar e passentar in emperneivel suentermiezdi en in'atmosfera cordiala. Ei dat la pusseivladad

da s'informar sur da differents temas e da s'inscuntrar cun autras persunas pertuccadas.

Il Café Zeitlos vegn menaus da persunas dil fatg sil sector da demenza che stattan a disposiziun per damondas e sclariments. Ei drova negina annunzia. Il Café Zeitlos ei gratuits ed aviarts per tuttas persunas interessadas. La consumaziun surpren Puntreis Center da sanadad.

Datums per 2018:

venderdis, 7 da settember
venderdis, 5 d'october
venderdis, 2 da november
venderdis, 14 da december
Dallas 14.00–16.00 en Puntreis Center da sanadad, Via Cons 11, 7180 Mustér.

Cheu survegnis vus informaziuns ed agid en connex cun il tema demenza:
Telefon Alzheimer dil cantun 081 253 91 40
Post da cussegliaziun Cadi 079 811 33 10

PUNTREIS
CENTER DA SANADAD

alzheimer
graubünden grigioni grischun



Liug da sentupada per persunas dementas e lur tierparents

LA QUOTIDIANA

Editura: Samedia Press AG
Editur: Hanspeter Lebrument
CEO: Thomas Kundert

Schefredactur: Martin Cabalzar

Redacziun

Agentura da Novitads Rumantscha (ANR):
Flurin Andry (fa), Augustin Beeli (abc),
Andreas Cadonau (ac), Claudia Cadruvi (vi), Gieri
Antoni Caviezel (gac), Annatina Felli (afi), Hans
Huonder (hh), Susi Rothmund (sr), Gion Nutegn
Stgier (gns).

Collavuratur redacziunals:
Giusep Capaul (gc), Lucas Deplazes (ld).

Adressas redacziunals:

La Quotidiana, Via Sommerau 32, 7007 Cuira,
tel. 081 255 57 10,
mail: redacziun@laquotidiana.ch

Agentura da Novitads Rumantscha (ANR)

Via da Masans 2, 7000 Cuira,
tel. 081 250 48 00, fax 081 250 48 03,
mail: anr@spin.ch
Surselva: tel. 081 936 47 00, fax 081 936 47 01,
mail: surselva@anr.ch
Engiadina: tel. 081 864 81 12, fax 081 864 81 22,
mail: engiadina@anr.ch
Surmeir: tel. 079 430 69 30, fax 081 684 32 82,
mail: surmeir@anr.ch
Schons: tel. 078 626 42 25
mail: b.riedhauser@bluewin.ch

Editura Samedia,

Via Sommerau 32, 7007 Cuira;
tel. 081 255 50 50,
mail: verlag@samedia.ch

Servetsch d'abunents e da distribuziun:

Via Sommerau 32, 7007 Cuira,
tel. 0844 226 226,
mail abo@samedia.ch

Inserats

Samedia Promotion,

Via S. Clau Sura 11, 7130 Glion
tel. 081 920 07 17, fax 081 920 07 18,
mail: ilanz.inserate@samedia.ch

La Quotidiana cumpara tschintg giadas ad emna
Edizien derasada: (Südstschweiz cumplet)
76 504 exemplars, Edizien vendida 73 188 exem-
plars (WEMF-/SW-beglaubigt, 2016)

Derasaziun: 171 000 lecturs (MACH-Basic 2018-1)

Pretschs d'abunaments sut:

www.suedostschweiz.ch/aboservice

Communicaziun da participaziun considerabla
sin fundament ad art. 322 CP:

nagin

© Samedia